



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3 Yangia anidakangma : f Tir Yimiyim

Instagram tiryimiyim@aolima

YouTube tir yimiyim TAPAK 7

**Punjab nung ano Aam Aadmi Clinic
100 lapoktsü: CM Bhagwant Mann**

**Hunter Biden anema ken o tanabuba
benokogo**



VOL. XXI NO. 62 (ADOK 62)

DIMAPUR

KÜPTOKNÜ (SATURDAY)

LUCHII (DECEMBER) 09, 2023

₹ 5.00

Neiketuno Sechü-i Miss Nagaland takok nguogo



Miss Nagaland 2023 Neiketuno Sechü (tiyongtsü) den 1st runner-up Vimgha Sheqi (abelen) aser second runner-up Ilihika Aye külemi agiba noksa angur.

Kohima, December 8, 2023 (TYO): Hokolbar nikongdang Neiketuno Sechü nem Miss Nagaland 2023 takok korang semtsüogo.

Beauty & Aesthetic Society of Nagaland (BASN)-i ayongzüka agiba sentong nung arishi küm 19 tain Neiketuno Sechü-i tetokteper 13 madak takok ngutetogo.

Iba sentong ya State Cultural Hall Kohima nung agi aser arishi küm Vimgha 20 tain Sheqi-i tanabuba jenjang aser arishi küm 19 tain Ilihika Aye-i tasembuba jenjang takoktem nguogo.

Miss Nagaland Neiketuno-isa Miss Perfect 10 subtitle angu. Maneni, Vimgha-i Miss Multimedia aser Ilihika-i Miss Photogenic subtitle tem angu.

Miss Nagaland 2023 nem Rs 1 lakh senpet den Rs 1,20,000

alangba gift hampers agütsü. Maneni, Vimgha Sheqi nem Rs 70,000 senpet den Rs 10,000 alangba gift hampers aser Ilihika Aye nem-a Rs 50,000 senpet den Rs 10,000 alangba gift hampers agütsü.

Iba dak aliba sub-titles angur ajak nem senpet den gift hampers agütsü. Miss Nagaland o first runners-up nati Miss North East 2024 atema direct entry anguba den Miss Nagaland-i Miss Grand India 2024 nung tokteptsü.

Tanga sub-titles takok angurtem:

Miss Beautiful Skin – Keziah Mero,
Miss Beautiful Smile – Tsiawavi Nyuwi,
Miss Talent – Flora Kent
Queen of Hearts – Katienla P Longchar.

Dimapur urban area atema VBSY tenzüikogo

Dimapur, December 8, 2023 (DIPR): December 8, 2023 nü Naga Shopping Arcade, Dimapur nung Viksit Bharat Sankalp Yatra tenzüikogo.

“Prime Minister Modi-i central schemes ajungkettsü atema ‘Viksit Bharat Sankalp Yatra’ tenzüikja liasü” ta Dimapur Deputy Commissioner Dr. Tinojongshi Chang-i ashi.

“Iba yatra ajanga teküpoktiba jenjang tashi nung central schemes balala osang prokshitsü. Urban bodies atema central schemes 17 lir anungji jila nung alirtemi iba yatra nungi maongka agia schemes balala teyari agitsü ayongzüker” ta pai ashi.

Maneni, public lennirtem aser media-i scheme balala indang osang public den prokshitsü ayongzüker ta Dr. Tinojongshi-isa ashi.

Paisa “Hamara Sankalp Viksit Bharat” tezüngzüktep agidaktsü.

Dimapur Municipal Council Administrator W. Manpai Phomia tesentepertem pelaa

agizükdang Yatra ya Dimapur kübok urban areas asoshi December 8, 2023 nungi tenzüker saka rural areas atemabo November 15, 2023 nungi tenzüikogo ta ashi.

Iba yatra ya urban areas nung aliba sensotem dang central schemes osang balala metetdaksütsü aser item tajangzük agidaktsütsü asoshi lir ta Manpai-i ashi.

Dimapur aser Chumukedima atema District Prabhari aser Deputy Director General of Shipping, Mumbai Dr. Rant Pandurang-ia o jembidang iba yatra ya central schemes matongertem asoshi lir ta ashi.

Sentong nung Rita Ghosh aser T. Onen Jamir, GB nati takok anguba (Meri Kahani Meri Zubani) lemsatap.

Yatra nung health camp (screening of TB, Sickle Cell & Anemia), PM Ujjwala Yojana (PMUY), Ayushman Bharat aser Pradhan Mantri Suraksha Bima Yojana (PMSBY) spot registration agia liasü.

NESO-i December 11 nü Black Day amongtsü

Dimapur, December 8, 2023 (TYO): North East Students’ Organization (NESO)-i December 11 nü state 7 nung Black Day amongtsü osang metetdaksüogo.

Citizenship (Amendment) Act, 2019 ya Northeast nung aliba lisopurtem anema lir anungji onoki iba anogo amongtsü ta NESO-i ashi.

“North East nung lisopurtemi Citizenship (Amendment) Bill 2019 anema ola adokaka India sorkari tashi mangai December 11, 2019 nü Rajya Sabha nung iba Act agizük aser tang iba dang Citizenship (Amendment) Act 2019 ta ajar” ta NESO chairman

Samuel B Jyrwa aser Secretary General Mutsikhoyo Yhobu nati sangdong ka nung ashi.

NESO-i December 11 ya North East atema teti Black Day asütsü ta sangoktsüogo aser iba nung ajemdaker North East state 7 kübok tongtipang tesemtem nung Black Flags aser Black Banners ayutsü.

“India sorkar dang asenoki Citizenship (Amendment) Act 2019 magizüker ta sayutsü atema iba anogo amongtsü. Kasa mapang India sorkari North East nung aliba lisopurtem dak yimtenren tsütsü temeten magütsüba atema nenshir” ta NESO-i ashi.

North East nung alir ajaki iba anogomung amongba nung yariteptsü aser kasa mapang Tsüngremi asenok nem agütsüba temeten atema raratsü ayongzüker ta NESO-isa metetdaksü.

North East Students’ Organisation (NESO) nung North East state 7 nungi kaketshir telok ti- Khasi Students’ Union (KSU), All Assam Students’ Union (AASU), Naga Students’ Federation (NSF), Mizo Zirlai Pawl (MZP), Twipra Students’ Federation (TSF), All Manipur Students’ Union (AMSU), Garo Students’ Union (GSU) aser All Arunachal Pradesh Students’ Union (AAPSU) dena lir.

Trinamool Congress MP Mahua Moitra Lok Sabha nungi anentsü

New Delhi, December 8, 2023 (Agencies): Trinamool Congress MP Mahua Moitra-i tim masüba inyakba atema Hokolbar anügdang Lok Sabha nungi anentsüogo.

Lok Sabha nung Ethics Committee report ka benokba sülen la MP nungi anentsü. Ajisüaka Opposition züngsemtemi Committee ajanga inyaksangshiba metetnüa asügdang aser iba report atema olemteptsü takhangba agütsü.

“Ethics panel dak MP tem anentsütsü tashi kecha mali. Narendra Modi-i aniba sorkari ni noktangtsü meranger saka iba ya BJP tamakok angutsü tetenzüker lir” ta Mahua Moitra-i ashi.

Lok Sabha ethics panel-i temzüng alema inyakogo. Ni code of ethics alema inyak ta parnok aitsür saka iba code mali. Lok Sabha nung teti inyaka aruba aser inyaktsü ajungmesoba inyakyim ka atema parnoki ni merenshir” ta laisa ashi.

Iba inyakyim atema Opposition lennirtemia Bharatiya Janata Party (BJP) aitsür.

Lok Sabha Ethics Committee panel report atema Moitra nem o mejembidakjaka opposition MP temi o atsütepa toktep saka Parliamentary affairs minister Pralhad Joshi-i TMC MP Moitra anentsütsü ken o benok aser ibaji voice vote ajanga agizük.

“BJP-i tashi aliba tetsür magizükteter. Parnoki BJP anema jembiba ajanga la MP nungi anentsür saka 2024 nung lai elections nung tokteptsü” ta West Bengal minister aser TMC lennir Shashi Panja-i ashi.

“Adani anema jembir ajak ola nembangtsütsü aser iba tatishitsüji Mahua dak atalokogo. Mahua nem Parliament nung o mejembidaktsü. Iba ya tasa atonga inyakba mapa ka lir aser tanü democracy-i tamakok nguogo. Tanü ya Democracy atema tammang anogo ka lir aser emergency tasembuba ama lir” ta Congress MP Manickam Tagore-ia ashi.

“Mahua anentsüba ya tarutsü atema tamaittsü tajung ka lir. Lai takok tuluba angutsü imlar” ta Congress lennir Shashi Tharoor-

ia ashi. “La dak tai tonglokttsüri ashiba nung ajemdaker lemtet agi. Iba ya temeten inyakyim anema lir” ta Shiv Sena (Uddhav Balasaheb Thackeray) MP Priyanka Chaturvedi-ia ashi.

“Iba inyakyim ajanga BJP-i tetsürtem asoshi chichiba tangatetba sayur. Sorkari külen Parliament nung Nari Vandan Vidheyak (Women’s Reservation Bill) agizük saka külen Parliament nungi tetsür ka- Mahua Moitra anentsür. Ibajia temzüng aser tashi kecha maliba ethics committee ka ajanga inyaker. Iba ajanga India-i tetsürtem aser democracy atema kechi osang prokshir” ta Samajwadi Party lennir Dimple Yadav-i metetdaksü.

“Tasütait MP Mahua Moitra ama nisung ka tim mesüi anentsüba ya alima nung democracy tulutiba atema tejashi anogo ka lir. Lai ochi jembiba atema iba ya ajurur” ta People’s Democratic Party (PDP) tanishir Mehbooba Mufti-ia ashi.

Mizoram CM Lalduhoma-i Tsüngremer yimli arudaktsütsü atema inyaktsü

Aizawl, December 8, 2023 (Agencies): Zoram People’s Movement (ZPM) tanishir Lalduhoma-i Hokolbar nü Mizoram Chief Minister inyaktsü tezüngzüktep agiogo.

Iba sentong ya Governor Hari Babu Kambhampati-i ketdangtsüa agi aser ZPM MLA 11-i minister inyaktsü tezüngzüktep agia liasü.

Sentong nung MNF tanishir aser Chief Minister menden toktsür Zoramthanga-i anir MNF MLA ajak aden.

ZPM Legislature Party-i Mongulbar nü parnok leader atema Lalduhoma aser deputy leader atema K Sapdanga shima liasü.

Züngsem 40 agi akümba Mizoram assembly nung chief minister dena minister 12 shimtsü akok.

Hokolbar nü Prime Minister Narendra Modi-i Zoram People’s

Movement (ZPM) Lalduhoma nem tenüngsang agütsü.

“Pu. Lalduhoma-i Mizoram Chief Minister inyaktsü tezüngzüktep agiba atema tenüngsang agütsür. Centre-i sorkar tasen den tesentaktep tajung yur Mizoram nung taginübatem tongtsütsü atema inyaka aotsü” ta PM Modi-i ashi.

Lalduhoma-i Chief Minister inyaktsü tezüngzüktep agiba sülen mezüngbuba mapaji Aizawl nung aliba de-addiction centre ka semdangba lir.

Lalduhoma-i Raj Bhavan nungi indangindanga Sakawrtuichhuna Tawngtai Bethel Camping Centre (TBCC)-i ao.

“Sorkar tasenba indang tongtipang mapatem rongnung ‘linüki Tsüngremer yimli arudaktsütsü’ atema asütsü” ta Lalduhoma-i de-addiction centre

nung jembidang ashi. “Tsüngremi yimlil marutettsüba tenokdangba tulutem rongnung drugs lir aser tanü linük nung lanur aika yi aser drugs ajanga taküm samar. Chief Minister inyaktsü tezüngzüktep agiba sülen ozü kidangi moi mezüng iba centre semdangba ya ni iba centre asoshi temulung agütsüba aser treatment facilities den sendaktepa aliba agi lir” ta pai ashi.

“Iba centre atema sentong tajung yanglutsü. Homes, jails aser centres ya ozüng alema inyaksangshil noktangtsü atema dang masü saka employment aser skills atema tongtipang lir” ta CM Lalduhoma-i ashi.

De-Addiction Centre TBCC ya TT Zohmingthanga aser pa kinungtsü KL Hmangaihuali nati lapokba lir. Tang iba centre nung drugs achir 860 anioka anepaludar.

Hornbill Festival Day 8: Naga nunger sobaliba balala maneni sayu



Chakhesang Cultural teloki 'Zhavame Phisho' ta asüba ken aser tsüngsanga shilem agiba mapang.

Dimapur, Luchii/December 08 (TYO): 24 buba Hornbill Festival 2023 tenzüker anogo 8 buba, Hokulbarnü Naga Heritage Village, Kisama nung "Cultural Connect" omen kübok Department of Art & Culture, Government of Nagaland ajanga ayongzükba Cultural Extravaganza sentong anepdang session nung tongti tesemdanger ka ama Route Manager, RMB Ultra Trail Cape Town and International Trial Run, South Africa, Chairman Board of Directors, Kibwe Kids, Jaco Janse Van Rensburg aser tesemdanger tongti ama VSM, Additional Director General Border Road (East), Pravin Kumar Hanumant Singh nati moaja liasü.

Iba session nung Host ya

Advisor, Industries & Commerce, Hekani Jakhalu liasü, Co-Hosts ya MLA, Dr. Tseilhoutuo Rhutso aser MLA, Jwenga Seb liasü. Maneni Tikhir kin nungi Y. Shuven Tikhir-i temoatsü meshija liasü. Iba session nung Chakhesang, Konyak, Garo, Khiamniungan, Ao, Tikhir, Angami, Kuki aser Chang kin nungi cultural troupes temi traditional games, ken aser tsüngsang agi shilem agia liasü.

Tzüngsang mejungi tzünglu arua mokongba ajanga sentong nung timtem kar agüjaka shilem agirtemi tejangraba tulu nung shilem agiba ajanga sentong takok ngua agi.

Nikongdang sentong ya General Manager (Construction) Railway, SK Pandey-i tongti tesemdanger ka

ama moatsü, kong Host aser Co-Host ya Advisor, Geology & Mining and DUDA, W. Chingang Konyak aser Advisor, Fire & Emergency Services and Home Guards & Civil Defence, S. Kiusumew Yimchunger liasü.

Iba sentong nung tetushi tesemdanger ya Joint Secretary, Ministry of Minority Affairs, C.P.S Bakshi liasü.

Nikongdang sentong nung Sumi Cultural Troupe, Phom Cultural Troupe, Rengma Cultural Troupe, Sangtam Cultural Troupe, Zeliang Cultural Troupe, Yimkhuing Cultural Troupe, Pochury Cultural Troupe, Lotha Cultural Troupe aser Kachari Cultural Troupe nungi tsüngsang aser ken agi shilem agia liasü.

Chümoukedima nung 9th Naga Lion Loom Festival temogo



Dimapur, Luchii/December 08 (TYO): Weavers place, Diezephe Village, Chümoukedima nung "Livelihood through Traditions" omen kübok December 6-7, 2023 anogotem aliba 9th Naga Lion Loom Festival temogo.

Iba benjong ya Excotic Echo Society ajanga Nagaland Tourism, Hornbill Festival, Department of Art & Culture aser Department of Industries & Commerce den lungjemer ayongzükba liasü.

Ola-angla amshirtem/südaker asoshi sapang agüja aser parnoki komala teyari aginer aser komala teyari agütsütetsü, itemji jangjatetsü aser parnok tesendaktep tajungba yangertsü asoshi iba benjong ya ayongzük, ta Excotic Echo Society ajanga sangdong

ka nung ashi. Iba benjong nung "Should weaving be inclusive for Naga men folk participation? Weavers fair wage, and way forward to address the sustenance of the Art of weaving in the State" onüktem jembia liasü, kechiaser ola-angla mapa sama aor aser tetsür aikati akhi yimya nung sü atakba nung temolung magütsür, ta ashi.

Naga Mothers Association tir Vilanuo Angela Yhome-i iba sentong nung jembidang, kin ka indang sobaliba aser yimsü takum ayutsü kanga tongtipang ta angatetdaksütsü nüngdaker, ta ashi.

Tarutsü putu asoshi mapa tajung inyakba asoshi lai tetsürtem aser tetsütem nem tenüngsang agütsü aser sobaliba mesamai takum ayuba ya hon-

tarepi mesüra sen dang nungi taoba, kechiaser sobaliba ya asen maitsü aser ibaji ajanga asen kin jangjar, ta ashi.

Tanü-asüing technology aser machine temi tekeraba aser talangba nung yanglutetsü, saka itemji rongsenketzüng aser business atema lir, aser itemji ajanga asen sobaliba nung ayak ka mali akumtsü, anungji südaker temi iba sempet mesamadaksüi wazüka ayutsüla, ta lai ashi.

Tensa-mapang melenshiogo, tanurtem school-i aor, mapa bushir aser kidang mener item mapa angazüksü mapang mali, saka tsürabortem daka tuluka keta lir, ta ashi.

Iba benjong tembangba sentong nung Lovi Cultural Club (NEZCC) ajanga Sumi Dance tsüngsang, Weavers Service Centre aser Founder & Owner, Farmer's Square Cafe, Zakietsono Jamir-i Natural Dye and Coffee indang workshop agütsü.

Weaving Competition nung südaker nisung ter-i shilem agia liasü. Iba tetoktepba nung mezüngbuba, tanabuba aser tasembuba jenjang ya Vekulii, Mulutolii Lipu aser Vesevolichuzho nungertemi angu aser parnok nem sentep sen 4000, 3000 aser 2000 agüja liasü.

Nagaland Angh aser T.R Zeliang nati asükhil lemsatep

Dimapur, Luchii/December 08 (TYO): Dimapur nung Nagaland indang taoba minister S.K Sangtam asüba osang angashia aoksar aser jashir, ta Nagaland Angh, La Ganesan-i sangdong ka ajanga ashi.

Pai minister densema Nagaland sorkar aser nüburtem jenjang balala nungi tenzüka liasü. Pa asüba ya state asoshi nübur lenir tajung ka samar alitsü. Pai maparen balala nung Naga nunger asoshi shilem agiba teti bilemtetsü, ta sangdong ajanga ashi.

Nagaland nung aliba nüburtem aser kü tenüing nung mangyimer kibong den asükhil lemsatep. Tulusang Tsüngremi kinunger nem tesunep aser tashi tasen agüjangma. Asür tanüla tesunep nung anisüngzükjang, ta Angh La Ganesan-i sangdong nung ashi.

Taoba mapang minister inyaka alisang, S.K Sangtam,

mapang talangka shiranga arur December 7, 2023 nü Dimapur nung mozüki ka nung asüba atema temolung shiranger aser mang ayimer, ta Nagaland Deputy Chief Minister T.R Zeliang-i sangdong ka ajanga ashi.

S.K Sangtam ya 52 Longkhim-Chare AC nungi MLA pezüben adoka 1989 küm Minister in-charge of PWD aser 1990 nung Minister in-charge of Health & Family Welfare inyaka liasü.

Asür Sangtam ya lenir tajung ka liasü aser pai tatishitsü tajung ka ama litetba ya Sangtam nunger aser Naga nunger asoshi kodanga mamashitsü otsü ka alitsü.

Pa asüba ya asenok asoshi takoksa tulu lir, aser mangyimer den asükhil lemsatep. Asür tanüla teti tatem maka tesunep nung anisüngzükjang, ta T.R Zeliang-isa ashi.

NDPP 29 Jangpetkong AC & Health Dept. ajanga CMHIS atema special drive agir



29 Jangpetkong AC kübok Chungliyimsem yimdak December 8, 2023 nü AB-PMJAY CMHIS asoshi Beneficiary Identification Drive (BIS) tenzüka sülen tangokba noksa ka nung NDPP 29 Jangpetkong AC ketdangsürtem, CMO Office Mokokchung nungi personnel tem aser Chungliyimsen Village Council züngsemtem angur.

Dimapur, Luchii/December 08 (TYO): NDPP 29 Jangpetkong Assembly Constituency ajanga Department of Health & Family Welfare den lungjemer constituency ajanga nung hopta tepiyong AB-PMJAY CMHIS (Chief Minister Health Insurance Scheme) atema Beneficiary Identification Drive (BIS) agitar.

Iba special drive ya MLA aser Advisor, Transport and

Technical Education, Temjenmenba-i sponsor asü aser NDPP 29 Jangpetkong AC office ajanga achayanger.

Chungliyimsen yimdak iba drive tenzüksüba mapang NDPP 29 Jangpetkong AC tir Aodangnok-i ashiba agi, constituency nung aliba nüburtem health aser temang anema lidaksütsü nükjidong nung iba sentong ya agir.

(Maneni tapak 8 nung...)

Ninang metsür nem scientific training agütsü

Dimapur, Luchii/December 08 (TYO): All India Co-ordinated Research Project on Honey bees and Pollinators, School of Agricultural Sciences, Nagaland University, Medziphema ajanga "Scientific Meliponiculture and Apiculture for Entrepreneurship Development" indang anogo ka training sentong Tseminyu New Town nung December 7, 2023 nü ayongzükba liasü.

Iba sentong nung menden Dr. Avinash Chauhan, Principal Investigator, AICRP (HB & P) cum Nodal Officer for Stingless Bees liasü aser Lily Tep, Apitherapist ajanga sentong tenzüka sarasadem.

Iba training nung Tseminyu

district kübok tzükong tenet nungi ninang metsür (beekeepers) 67 tashi arua shilem agia Dr. Avinash Chauhan, PI, AICRP(HB&P) ajanga mezüngbuba technical session nung ninang metsüba yimya balala sayua liasü.

Tzü-mopung wazüka ayuba nung ninang ajanga tongtipang shilem agiba den ninang junga anepaluba indang pai angatetdaksü.

Alakteta jaoker Logubu, Chairman, Ward-2, Tseminyu Town ajanga iba sentong nung jembidang ecosystem nung ninang-i shilem balala agiba aser ninang nungi products balala yangluba indang paia ashi.

(Maneni tapak 8 nung...)



24TH Hornbill Festival 2023
DAY 9
MORNING - 10:00 AM

HOST
 DR. KEKHRIELHOUHIE YHOMÉ
 ADVISOR, SCHOOL EDUCATION & SCERT

CO-HOST
 MR. IMKONGMAR
 ADVISOR, MINORITY AFFAIRS & SERICULTURE
 MR. S. TOIHO YEPHTHO
 MLA

CHIEF GUEST
 MS. CHAITALI PANMEI
 PR. CHIEF COMMISSIONER OF INCOME

HONOURED GUEST
 I. HON'BLE MR. JUSTICE MICHAEL ZOTHANKHUMA
 JUDGE GAUJHATI HIGH COURT
 II. HON'BLE MR. JUSTICE DEVASHIS BARUAH
 JUDGE GAUJHATI HIGH COURT
 III. MOHAMMED ASIF
 EXECUTIVE DIRECTOR
 PLAN INTERNATIONAL (INDIA CHAPTER)
TRIBAL GUEST
 S. TSAPISE SANGTAM
 SANGTAM

AFTERNOON - 1:00 PM

HOST
 MR. KUDECHO KHAMO
 ADVISOR

CO HOST
 MR. TEMJENMENBA
 ADVISOR

MR. C. MANPON KONYAK
 MLA

CHIEF GUEST
 SH. JOSE MANUEL NORONHA
 CHAIRMAN, GOA PUBLIC SERVICE COMMISSION

HONOURED GUEST
 LT. GEN H S SAHI
 AVSM, YSM, SM GOC # CORPS

SCAN FOR HORNBILL SCHEDULE




December 08, 2023 nù Dehradun nung 'Uttarakhand Global Investors Summit 2023' tetenzük sentong nung adenertem tangokba noksa nung angur.

Telangana sorkari election mapang nangzükba onük 6 agizük

Hyderabad, Luchii/ December 08 (Agencies): December 9 nü taoba mapang Congress Tir, Sonia Gandhi asoba anogomong nungi party-i election mapang nung nangzükba onük ana mapa küma inyaksü, ta pai metetdaksü. Tenangzükba anaji ka, state meyong RTC bus nung tetsürtem angati senzüdaksütsü aser kaji Rajiv Arogyasri health scheme kübok insurance sen lakh 10 tashi agütsütsü, ta pai ashi.

Chief Minister, A Revanth Reddy leniba nung state cabinet mezüngbuba senden amenba sülen osangbenertem den jembidang Minister, D Sridhar Babu-i, Chief Minister Reddy den Deputy Chief Minister Mallu Bhatti Vikramarka aser minister temi nüburtemi Congress nem takok ngudaksüba atema pelar, ta metetdaksü.

Paisa, state rongsenkettzüng jenjang report tejangja sangdongtsü atema Cabinet-i kettangsertem dang taoba mapang sorkari 2014 küm nungi tenzüka December 07, 2023 anogo tashi nung department balala nung senotsü teindokba osang tejangja metetdaksü ta tuyuogo; onoki iba osangji nenok nem metetdaksütsü, ta metetdaksü.

Punjab nung ano Aam Aadmi Clinic 100 lapoktsü: CM Bhagwant Mann

Amritsar, December 08 (Agencies): Punjab Chief Minister, Bhagwant Mann-i, state nung nüburtem nem health service tajungtiba agütsütsü atema sorkari ano maneni aam aadmi clinics 100 tali lapoktsü, ta metetdaksü.

Brihostibarnü Amritsar nung health & family welfare department inyaksangshi asadanga senden nung jembidang chief minister-i, state sorkari primary healthcare tashi itshitsü aser ajungkettsütsü atema rangloker inyaker, ta metetdaksü.

Paisa, tang tashi nung state nung AAP sorkari 'aam aadmi clinics' 664 lapokja lir aser item clinics nung tashidak 40 dak tema angati tendangtsüba den külemi nungdakba mozü tapu 84 angati agütsür, ta metetdaksü.

"Ano maneni nüburtem nem medical treatment tajungtiba agütsütsü atema taruba anogotem nunga item ama clinic 100 dak tali lapoktsütsü," ta Mann-i metetdaksü. State nung healthcare

2018 küm nungi tenzüka bendanglen India nunger kaketshir 403 süogo

New Delhi, December 08 (Agencies): Hokolbarnü Centre sorkari, 2018 küm nungi tenzüka tanü tashi nung bendanglen India nunger kaketshir 403 kuli balala ajanga süogo; item kulitem rongnung lendong nung asüba densema lir, ta metetdaksü.

Rajya Sabha senden nung Union Minister, V Muraleedharan-i, 2018 küm nungi tenzüka bendang linük 34 nung India nunger kaketshir 403 süogo; kaketshirtem teimba asüba linükji Canada (kaketshir 91 asü) lir, ta metetdaksü.

2018 küm nungi tenzüka tang tashi nung United Kingdom nunga India nunger kaketshir 48 asü, Russia nung kaketshir 40, United States

nung 36, Australia nung 35, Ukraine nung 21, Germany nung 20, Cyprus nung 14, Italy nung 10 aser Philippines nunga 10 asü. Bendanglen India nunger kaketshirtem kümzüka ayutsü atema sorkari inyaker, ta shia Muraleedharan-i tarutsü nung maneni item ama tatalokba nokdangtsü atema inyaksü, ta ashi.

Paisa Indian missions nungi kettangsertemi mapang shia colleges aser universities semdanga India nunger kaketshirtem den shisa lemsateper, ta metetdaksü.

"Bendanglen India nunger kaketshirtem kümzüka alitsü atema India sorkari tongti süa inyaker. Lendong atalokba mapang nung tekeratiba nung

item linük nungji tim kettangsertem den tongtepratepa inyaker aser jungjunga bushisüngdanga aibelenertem nem temerenshi agüjang ta mepishir," ta Muraleedharan-i metetdaksü.

Bendanglen India nunger kaketshirtem aika asüba dak sendakba nung osangbenertem den jembidang External Affairs Ministry otongdar, Arindam Bagchi-i, "Item ama tatalokba ya sorkar den tongtepratepa inyaksüsa ken o ka asü masüar ni memetet. Tatalokba kar nungbo melung malemstsüsa lir, ibayongji asen kettangsertemi item kibongtem den tongteprateper aser item linük nungji kettangsertem den-a tongteprateper," ta metetdaksü.



December 08, 2023 nü Mumbai nung aliba RBI Headquarters nung Reserve Bank of India (RBI) Governor, Shaktikanta Das den Deputy Governors- Michael Debabrata Patra, M. Rajeshwar Rao, Swaminathan Janakiraman aser T Rabi Shankar nungeri osangbenertem den jembitsü lia tangokba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUCHII 09, 2023

Myanmar Sepaitem tashi ajemer

A khidang Burma ta ajaba lima Myanmar ya nübortemi election agia shimtetba yimsüsürtemi masü saka sepaitemi talangba tashiyim agi yimsüsüa arur. Aji oda, 1989 küm Burma sepaitemi democracy aginertem aika tepseta endoker külen government aküm aser ajungbenenaka Burma agi Myanmar melen aser linük yimtiba tenünga Rangoon agi Yangon melen. Iba anogo nung jagi sepaitemi dang yimten tashi amshia yimsüsüba mapang, alima kintemi anung marem 2020 küm election agi aser iba election nung Aung San Suu Kyi-i aniba National League for Democracy (NLD) teloki tatar hoho ana nung menden 664 nungi menden 346 nung takok ngua government akümtsüba liasü saka Myanmar sepaitemi la aser la den külem telok nung lenirtem aser election nung adokertem ajak puoka yur parnok nem government mekümdaktsü. Aji oda, election nungbo makok saka Myanmar sepaitemi takoker NLD telok nungi yimten tashi rakzür 2021 küm February ita nungi tang tashi yimsü süa arudang, parnoki tashiyim amshia parnok den madener yimten lenir nisung meyirijang metsü shi tepuokdak yuogo aser tai maketba nübortem meyirijang pezü shi tepsetogo aser nisung lakh tertenet shi talidak maka kümogo. Iba amaji Myanmar sepaitemi tashiyim agi nübortem alidak tayimtsü tashi amshia makdoka timtemdaktsüba agi NLD nung adenertem aika telongi ai aser joko parnokia tangbo Myanmar sepaitem den azü tokshia rarar. Aji oda, Myanmar nung ajak asoshi tia majung, Democracy atema nübortema telong nungi prangpong injang amshia raratsüsa akümer. Aji oda, tangbo Myanmar sepaitem den raratsü atema Arakan Army, Myanmar National Democratic Alliance Army aser Ta'ang National Liberation Army telok asem ka küma longjemer Myanmar sepaitem anema sashia makyonga odagi. Item telok asem agi akümba telongjem dang "Three Brotherhood Alliance" ta ajar aser parnoki tang tashi nung Myanmar anüdoктиplen China aser India artsülen Myanmar sepaitem aliba tesep aika makdokogo aser Myanmar sepaitemi dena India aser China leni jena aoba osang angashir. Atangji, Myanmar sepaitemia yakta election agishitsü asoshi jembia aruogo aser taküm 2023 küm August nung election agitsüba liasü saka sepaitem arükhudong Gen.Min Aung Hlaiang-i election agitsü anogoji thia-thia arur. Ano, sepaitemi jagi election agitsü ayongzükaka NLD lenir Aung San Suu Kyi-bo election nung metokteptetsüsa temzüng ozüng tasen lateta lir. Ibaji dang masü saka sepaitemi Aung San Suu Kyi yabo taküm piyong tepuokdak ayutsüsa lai aibelenba ken o agütsüpet agütsür. Iba ama Myanmar lima tensa tia ka nung, taoba October ita 27 nü 'Three Brotherhood Alliance' teloki ajungbena Myanmar sepaitem amaktsü tenzükba anogo nungi Myanmar sepaitem tashi kanga ajema kümogo. Atangji, ibai meimlaba tatalokba kabo masü saka Three Brotherhood Alliance teloki Myanmar sepaitem anema takok ngua makyonga aoba yabo imlaba dang nungi tali parnoki takok angur asütsü. Tang parnoki Myanmar sepaitem alidak tesep ka nungi ka ta makyonga aoba yagi menua melii Myanmar sepaitemi yimten tashi yutsütsüsa akümtsü.. Tanga Myanmar sepaitemi Three Brotherhood Alliance purtem denji yimjung nung tajung ka jembidi ta ashir saka Three Brotherhood purtem jagi sepaitem dang tamasa yimten tashiji tokjang ta ashir. Aji oda, Myanmar sepaitem mena aliba yimten mendenji memenui aitsütsüsa akümtsü. Tawa Kohima nung US ambassador to India, Eric Garcetti-i ashiba agi, Myanmar nung nübortemi shimtetba yimten anendaktsür sepaitemi yimsü asübaji US-i aitsür aser Myanmar nung Democracy maru tashi US-ia Myanmar nem rongsen teyari yoka aliba ajak anena atatsü. Eric Garcetti-isa ashiba agi, alima nung nisung aikati US-i tangsa tang alimai meteta democracy anemertem anema inyaktsü amai bilemer, ajisüaka US-i rongsen tsütsü tama teyari anena atar aser koba linük nung südirsüaka peisasa pei lima atema telemtetba agitsü mapang agütsür. Aji oda, Myanmar tebilemstü yaa Myanmar nungertemi parnok dak apet yakta latetsüsa akümtsü aser idangjiibo sepaitemi maginüyonga tantsü Aung San Suu Kyi-i yimsü asütsü aser sepai tanishirtem aika tepuokdaki aitsü.

OLEMSABANG

Nü Wadang Koktetang

K. Temjen Jamir, Yimozülur, Tir Yimyim

(Yashi adok nungi...)

2. Tanabuba akoktsüba wadangji Nü Kinungbo aser nür Chirnurtem

Nü kinungbo mesüra nü chirnurtemji nai bushiba agi anguba masü saka Tsüngremi ne nem agütsüba sempettem lir. Talisa, T.Ken 127 nung Chirnurtemji Tsüngremi agütsüba senmang aser sempet ta angutsü. Aser naji Tsüngremi nü kinungbu den yaritepa alitsü yanglu ta Lipok tapu nung shia angur.

Anungji, nü kinungbuji suaba masü aser nür chirnurtemjia azü ak, tagidak maka aser matu malem, mazükmaru chirtem masü, parnokji asenok nem agütsüba Tsüngremer senmang aser sempet lir. Nai nü kinungbuji nür kibong chuba yimli nung chuba ama bilema akümtsübuang, Kodanga tangar tsüngdang nü kinungbo majung tejembi aser nai nü kinungboi aginüba aser maginübatem meteta liang. Teburi ki asür aser tetsüri kibongji yamaji yanglur.

Mobile den masü kinungbo aser tanurtem den mapang endoka Laishiba nungi mesüra sobaliba nungi otsü bener arua jembiang. Nai nü kinungbo meimba tamaitü par tsürabur aser adianutem dang meimang. Nü kinungbo ita sen mesüra ayangba sen agi meperi ser ochimashi len nungi senotsü bener arutsüsa nü taginübatem agi pa tekangshi aser shisa tebuludaktsü, iba jagi pa arr mashitsü aser lokti nung akhüm samatsü. Nai metetba lemsatepba dang masü saka nai memetetbatema nai nür tanurtem dang asüngdangang. Iba jagi asenoki parnok dak temulung alemba aser akümtsübuba yimya ka sayur. Akok tashi nürji kaket azüngba kibong ka kümang. Aonsutsü aser süoshi aliba dokani dang masü saka kaket ayokba dokania oang aser anogo shia osangkaketem zünga anidakang. Naji nür kibong nungbo chubatsür dang masü saka sannükla, Child tesayur, Home evangelist ama bilema anogo shia nü wadang nung nokdakang.

Mapang mapang shia nür kibong nung asüpila sentep alir ama jembia kinunger telongjem mapang agiang. Idangji, nai nü kinungbo aser tanurtem tenüng sangang aser nü taküm otsü shiang. Iba telongjem mapang nung Solomon ken tapu 5:16 nung shia aliba ama, " na kü meimsang aser kü medemer," ta kinungbo dang shitetang. Kibong nung nü wadang akoktsü atema teti nai nü kinungbo aser nür tanurtem dak nemeter, parnok taküm ne nem moatsüba atema parnoki angashia Tsüngrem dang shiang." Iba kisüng jagi nü wadang tulubalenka koker alitsü.

3. Tasembuba wadangji Lokti Temenentem kokang :

Dimapur Watsü Telongjem ama lokti tentet tajung ya lokti ajungtsü atema lokti temenentem nem lokti mamoksepdaktsüi "Arok Tejakleni" anir aotsüba telongjem ka lir ta nenok nükjidong aser mapa ajanga angateter.

Iba nükjidongji ataloktsü atema, tamasa tanü putu nung lokti temenen kobai asen kibong nem tebilemstü agütsür aser koba mapatemisa alima merenloki rajanga kümdaktsür, item lokti temenentemji repringteta akoktsü nüngdaker . Aji oda, tanü asen lima menendaktsüba lokti temenentem aika rongnung tetsütitemji itemi asütsü :

(1) Ochimashi - Tanü asen lima loktiliba nung rongsen bushia takar akümtsü asoshi farming mapa mesüra industry lapoka business inyaker masü saka politicians aser government servants akümer aser ain aket ama manger sangwa nung takar kümer sayur.

Aji oda, government-bo tesensakba-tesensakba akümer saka yimsüsür aser tulurtembo takarba-takarba akümer. Kima yimdongbo auyi aser lishi agi tasüng saka asenok kilong aser kimabo tanga lima mesüka temerük aser topur kanga junga yanglur. Itemji jakdaka ochimashi mapatem inyakba kuli lir, saka asenoki ochimashi anemaji ola jang kata madoker. Ochimashi mapa inyakba dang nungibo lokti katia ochimashi mapatem anema ola madokba ya tesüngmangtsü taketba. Tanga ochimashi mapatem mebushiyonga, tetsürtemi danga government mozü kidang tetsür nu amongdak takdang aser shiranger anepaluba jenjang mapang shia repringdanga mittsüla. Tanü asüngbo tetsürtem asoshi department-a balaka lapoka lir, anungji center nungi tetsür aser tanurtem asoshi kechi teyarisa arua ali, itemji asüngdangtepa metettsüla aser tajangzüktemji shitak agitsü merangtsüla. Aji oda, school nung tanurtem nem chidaktsüba midday meal ama aser Social Welfare nungi tetsür, tanur aser tantsür tamburtem asoshi teyari angutsü alibatem bushia agidaktsütsübaji tetsürtem telongjem teinyaktsü wadang tongtibang ka asütsü. Kasaji department ajak nung tetsürtem asoshi teyari aser tajangzük agütsütsü atema sentong balala renema lir, anungji itemji asüngdangtepa metettsü merangtsüla. Metetbaji tashi, Knowledge is Power, ta metetdi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

California nung sensaker tema Khristmas sentong ayongzüker

December 08, 2023: California nung aliba Arogo tulukati Honibarnü (December 09, 2023) sensaker kibongtem atema Khristmas sentong ka ayongzüka lir; iba sentong nung nisung 2,000 dak tema adentsü imlar.

Assemblies of God den affiliate süa aliba Destiny Christian Church-i ayongzüka sentong nungji sensaker kibongtem nungi tanurtem nem kazütsü, kaket aser süoshi agütsütsü.

Küm shia iba Arogoi Destiny Community Center nung 'Love Our City Christmas' ta ajaba sentong ya ayongzüka agir.

Iba sentong nungji tanur shia nem kazütsü, tsüngsem, tola-süoshi, jacket aser kaket kaka angati angutsü aser Santa Claus den külemi noksa tangoktetsü.

Osangbener den jembidang Destiny Church otongdar, Tanner DiBella-i, Arogoi 2013 küm nungi tenzüka küm shia 'Love Our City Christmas'

sentong ya ayongzüka agir; nüburtem moatsütsü nükjidong nung iba project ya tenzüka liasü, ta metetdaksü.

"Sodi mapang (Khristmas mongpu) nung nisung aikati nüngdak peria mangur. Sensaker kibong aikati chiyungtsü, süoshi aser security mangur, talisa sodi mapang nung nüngdak aika mangur," ta pai ashi.

"Ajioda Destiny Arogoi ayongzüka Christmas outreach sentong ya ajanga nüngdakbapurtem yaria kibongtem moatsür," ta paisa metetdaksü.

DiBella-i, takümbo ano kibong teimba asentsü atema moapu tali bendenlokogo, aser tesem ka nung tanurtem nem kaket kaka shimdakja parnok nem agütsütsü atema "Storyland" area bendenlokogo, ta metetdaksü.

Iba sentong nung adentsü atema kibong 2,000 dak temai tenüng agütsüogo aser iba sentong nungji volunteers 200-

i yariteptsü, ta DiBella-i metetdaksü.

"Pei nüngdak balala periba dak alia onoki kibong ajak nem parnok meimertem lir ta metetdaksüner. Sodi mapang yta takoksa anguba aser azüngmeyak bilemtetba mapang ka lir, ibayongji onoki tanur aser tsürabur shia meimertem lir, ta parnok nem angatetdaksüner. Khristmas mapang ya taochi, temeim aser tekümtet sempet anguba mapang, ta asenok ajak nem nenshia metetdaksüba mapang ka lir, anungji onoki kibong ajak nem ibaji angatetdaksüner," ta paisa metetdaksü.

Taküm küm tetenzüklen Destiny Arogo nung tongti pastor, Greg Fairrington aser Capital Christian Center nung tongti Pastor Rick Cole nati külem shidi ka ajanga, Sacramento nung aliba Capitol Center-ia satellite campus ka ama Destiny sentong nung shilem agütsü, ta metetdakja liasü.

Russia-i Ukraine Greek Catholic Arogo aser ministries nokdang

December 08, 2023: Russia nung ketdangsertemi Ukraine kübok parnoki atsüngba Zaporizhzhia region nung Ukrainian Greek Catholic Church (UGCC) aser Catholic ministries ajak nokdangogo, ta Kyiv nung aliba Arogo communications office ajanga metetdaksü.

December 07, 2023 nü UGCC-i parnok indang website ajanga, area military-civil administration nung tongti, Yevgeny Balitsky-i sign süa aliba tetuyuba copy ka parnoki nguogo aser iba shidi nungji Russia ketdangsertemi UGCC nokdangba aser Arogo meyong kiojentem administration-i agiadokba metetdakja lir, ta metetdaksü.

Russia ketdangsertemisa Catholic Arogo indang Knights

of Columbus & Caritas nokdangogo.

UGCC-i sangdong ka ajanga, Russia nung oshi nung December 26, 2022 nü züluba shidi ka tang ang parnok nguogo, ta metetdaksü.

Iba tetuyuba nungji UGCC-i inyakba mapatemji Russian Federation indang yimsü aser public organizations dak sendakba ozüngtem alema lir' ta shia lir.

Kasa shidi nungjisa, UGCC lenirtemi bendanger intelligence services den külemi inyaker aser 2022 küm March-April nung Russia anema rally agiba nung UGCC-i shilem agia lir, ta shia lir.

Kasa shidi nungjisa, UGCC Tenla kitem aser kiojentem nung tapoktsü osettem aser raraba hadirtem rizünga lir aser Arogoi

Russian Federation anema inyaktsü atema ayongzüka kakettem parnoki alemer, ta shia lir.

Yaküm February ita nungi Russia-i Ukraine amak tenzüka sülen Arogo kübok Knights of Columbus-i Ukraine nung million 1.4 dak tema yariogo; parnok nem teyari pound sen million 7.3 jenjang agütsü aser teyari oset 250,000 den 400 wheelchair 400 agütsüogo.

Russia nung ketdangsertem tetuyuba nungjisa Caritas network nokdangba metetdakja lir; item rongnung Catholic Charities USA (Caritas Polska); Caritas Czech Republic aser Ukriane nung Caritas agency ana-Caritas Donetsk aser Caritas Melitopol densema lir.

ANO GO ABEN TSÜNGREM DEN

Tsüngremer mulungba Tsüngremi akoker

2 Kor. 9: 6-15

Aser ajak nung teti nenok onsara teperi aka nung, mapa tajung ajak nung arentsü asoshi, Tsüngremi nenok nem taochi ajak rendaktsütsü akoker. 2 Kor. 9:8

Asenoki mapa sentong tapu balala aika yanglur. Teimla tulu nung tenzüker saka yimlaba ama mesüi atemer. Nisung shia dak tashi mait lir. Shingaia pai/lai inyaknüba ajakbo inyaktsü makok, anungji asenoki asen tejangraba asen tashi den putepa dang ayutsüla.

Meimchir tashi maittem den medem dang nung, Tsüngremi Pa nükjidong temulung lemteta inyaktsü akoker. Mezüngbuba pa tashi tendangtsü menüngdaker. Nisung teimbai Tsüngremi akoker ta nangzüker.

Iba jagi asenok koda yarir? Tsüngrem tashi aser nisung tashi mait nung kechi tetsüngda adoka lir, ibaji jungteptsü asoshi Tsüngremi lenmang ka bushiteta lir aser ibaji taochi lenmang. Pa taochi agi Pai asenok tashi mait angatetter, aser taochi ajanga Pai asenok yaritsü asatet. Temeim agi asenoki makokba Pai inyaktsü. Asenok alangzüksü asoshi Pai pei chir yok.

Pai asenok meim nung taküm tia aika nung Pai Pa teyari asenok nem agütsü. Pauli ashir, "Tsüngremi ne nüngdak dang tali agütsütsü akok". Kasa Tsüngrem shibai Paul anogo nung inyak tanüa asenok dak aser asenok ajanga Pa taochi rendaktsütsü akoker.

Sarasadem : T emeim Kibur, Nai onok ajanga atalokdaksütsü akokba mapa tajung aser tulu bushitsü onok dak ajungshiang; Yisu asoshi. Amen.

Mapang ajak nung Kibuba nem tenüngsang agütsütsüla: Neibalie Kiewhuo



December 8, 2023 nikongdang DDSC stadium, Dimapur nung Inter-denomination tanela asentenshi sentong aser crusade nung Lotha Baptist Church, Dimapur choir-i ken atandang tangokba noksa nung angur.

Dimapur, Luchii/December 8 (TYO): Hokolbarnü DDSC stadium, Dimapur nung Inter-denomination tanela asentenshi sentong aser crusade nung tongti o jembirji Koinonia Baptist Church nung pastor, Neibalie Kiewhuo liasü.

nung ajemdaker Tsüngrem O jembia liasü. Iba Lai nung tammang nung jajartemi temelenshi ajangshitsü aser tesangwa angutsü indang shia lir.

Pastor-i, anüdok nungi anülü tashi Kibuba tenüng asangtsüla, ta shia mapang ajak nung Kibuba nem tenüngsang

agüjang, ta lokti ayongzüka liasü.

Iba sentong nung Koinonia Baptist Church worship team-i tekülem aser tetushi ania liasü.

Iba sentong ya Koinonia Baptist Church nung Asst pastor, Menuosielie Üsou

leniba nung agi aser Lotha Baptist Church, Dimapur choir-i ken ka aten.

Kasa sentong nungsa Hindu yimsü toktsür Khrista agizüker, Bindu Prasad-i lai Yisu Khrista ajuruba sülen la taküm nung tasü lendong pezüben nungi kümzüka

lemsatep.

Laisa lokti dang, Yisuji dang atangji aser taküm lenmang lir, ta ashi.

Brihostibar nikongdang crusade nung Pastor Samuel Sengupta aser Rev. Zotuo Kiewhuo na ajanga shirangertem aika anepja liasü.

Junga mejajateter ka, amoi mouteti timtemer ka, tepinbang timtem alirtem aser teku tashidak keta alir ka densema nisung aika taneptsü ngua liasü.

Iba crusade ya December 10 tashi agütsü aser anogo shia nikongdang 4:00 ako nungi sentong tenzüksü.

Organising Committee-i iba sentong nung adentsü atema Dimapur nung alirtem dang masü saka Nuiland, Chümoukedima aser Assam nungi tejangrar ajak pelashishia jaokogo.

**AO OSHI ANGAZÜKDAK:
TANÜ ANGAZÜKTSÜBA OJANG**



Sentepki

(n) Telok adenshir Tsüngrem külemba ki (church building)
* Tanü asüing arogotemi tenlaki topur kanga junga yanglur.

Senti

(adj) jenjang tulu aketba tagitarutsü (precious)
* Takar kidang senti oset aika angutsü.

OLONG PAITEP # 6638

1		2		3		4			
5									
					6			7	
		8							
		9						10	
	11								12
			13		14	15			
16									
					17				
18									

TIPIEN

- 3. Nükjidadong - (7)
- 5. Rong tulu ka - (5)
- 6. Tebilemba - (5)
- 8. _____ long - (4)
- 9. Tembar - (7)
- 14. _____ shin - (4)
- 16. Ajak wara - (5)
- 17. Temeshi tentet - (5)
- 18. Teyari o (kaket nung) - (7)

LANGTSÜNGLEN

- 1. Zülujang - (5)
- 2. Lemzüksüba - (6)
- 3. Tekong sobutsü - (4)
- 4. Tarak - (4)
- 7. Tzüma nung senzüba ka - (3)
- 10. Timba aküm - (6)
- 11. Meshidak - (3)
- 12. Yong-i atakba oset ka - (5)
- 13. _____ shiruru - (4)
- 15. Mechinüi aküm - (4)

OLONG PAITEP # 6637 TELANGZÜBA


TIPIEN :

- 1. Telok, 4. Aluru, 6. Ozüing, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü,
- 5. Lenti, 7. Tajangzük, 11. Teronem,
- 12. Sempa, 13. Jahaz.

NAI-A YA METETTER MA



China lima nungbo tangari meinyakba kotulangto mapa balala aika inyaker aser item rongnungji sepai tasen training agirtem daka langka balaka inyaker. Parnok drill agiba mapang terakata marakzüki indang-indanga nokdaktsü atema kanga tila ka dang süka shishia kongshitsüsa teküm anasa tola collar nung pin taju ka tuloka yutsür. Koda tesüngmangtsü!

NCC-i Meghalaya nung nation building camp ayonga amonger



Shillong, December 8, 2023

(Agencies): Alima nung lanur telok tulutiba National Cadet Corps (NCC)-i Meghalaya yimtiba Shillong nung nation building camp ka ayongzuka agidar.

Iba camp ya 'Ek Bharat Shreshtha Bharat' (EBSB) omen nung ajemdaker agir aser state balala tsüngda sobaliba lemsatepba ajanga lanurtem longjemtsü nükjidadong lir.

NCC Directorate North Eastern Region (NER) ajanga EBSB-1 camp ayonger aser iba nung Northeastern India nungi state 9 den Madhya Pradesh aser Chhattisgarh nungi NCC Cadets 600 adenshiogo.

EBSB camp nung lanurtemi sobaliba sentong balala nung shilem agitsü, Meghalaya nung tesem balala sema senzütsü aser shisalen sayur balalai tayongzükba o jembiba

angazüksü.

Iba camp nungsa anogo ananü EXPA (NCC Exchange Participation Association) alitsü aser iba nung India kübok tesem balala nungi mongin nisungtemi all round development atema NCC cadets nem training agütsütsü.

Iba camp ya December 6 nungi tenzük aser December 16 nü mega cultural programme ka agia tembangtsü.

Assam sorkari constable 28,813 tashi Lance Naik ajungket

Guwahati, December 8, 2023

(Agencies): Assam Police atema tanü ya kanga dang tongtipang anogo ka lir aser ibaji state sorkari constable 28,813 tashi Lance Naik jenjang nung ajungketba lir.

Constable tem ya Armed Branch nungi 21,275 aser Unarmed Branch nungi 7,538 lir. Iba mapa ya state cabinet ajanga agizükba career development scheme nung

shilem ka lir. Assam police ajungkettsü aser public service delivery tajungba agütsütsü mechi nung sorkari iba mapa inyakogo.

“Assam Police putiotsü nung otsüsütsü anogo, künu nung Constables 28,813 tashi L/Nk jenjang nung ajungketogo” ta Assam DGP GP Singh-i metetdaktsü.

“CM Himanta Biswa-i iba mapa inyaktsü mulungba atema

kanga pelar. Assam Police ajungai CM Office Assam aser @mygovassam (Home Department) dang kanga pelar” ta pai ashi.

State sorkarisa Assam Police atema ration money allowance teimba agütsütsü lemtetogo. Allowance ji nisung shia Rs 2,500 lir aser officers o personnel ajak temang anema ayutsü aser chiyungtsü tajung achitsü atema lir.

Centre-i Tripura nem Rs 81.75 crore lemezüksü

Agartala, December 8, 2023

(Agencies): Centre sorkari education aser healthcare jenjang tajungba akümstü atema Tripura nem Rs 81.75 crores lemezüksüogo.

Tripura Chief Minister Manik Saha-i infrastructure tajungba akümstü atema bendanga agüja inyaka arur.

Centre-i sen agütsüba nungi MBB College nung science building aser Gandatwisa Government Degree College nung women's hostel yanglutsü

dena lir.

“Centre sorkari special central assistance kübok Rs 77.15 crores agütsür aser iba ya MBB College nung G+4 storey science yanglutsü atema lir” ta Dr. Saha-i ashi.

“Iba ajanga MBB College nung kaketshirtem aser tesayurtem ajangzüksü. State sorkari quality education agütsütsü aser educational infrastructure ajungkettsü meranger” ta pai ashi.

Dhalai District nung aliba

Gandatwisa Government Degree College nunga 50-seater women's hostel ka yanglutsü mulunga agizükogo ta CM Saha-isa metetdaktsü.

Iba mapatong atema Centre sorkari Rs. 4.60 crores lemezüksüogo aser North Eastern Council (NEC)-ia teyari agütsür ta paisa ashi.

State sorkarisa Agartala yimti nung aliba Master Para nung health and wellness center tasen ka yanglur.

Mizoram nung Zoram People's Movement sorkar kümtetogo

Aizawl, December 8, 2023

(Agencies): December 8, 2023 nü Mizoram nung Zoram People's Movement (ZPM) tanishir Lalduhoma-i Chief Minister inyaktsü tezüngzüktep agiogo.

Mizoram nung Mizo National Front (MNF) aser Congress teloktemi dang sorkar ketdangsüa aruba sülen tang mezüing atema party tasen kati sorkar yimsü asütsü.

ZPM ya 2019 nung ang

political party ka ama register süa liasü aser küm 4 sülen taküm Mizoram Assembly elections nung parnoki menden 27 nung takok angu.

Mizo National Front leader and outgoing chief minister Zoramthanga was present.

Tanü tezüngzüktep agiba sentong nung Mizo National Front tanishir aser chief minister menden toktsüsang Zoramthanga aden.

Pa den külemi legislature party

leader Lalchhandama Ralte-i anir MNF MLA ajak aden. Sentong nungsa taoba chief minister Lal Thanhawla aden.

Mizoram nung Zoram People's Movement (ZPM) sorkar nung minister tem:

K.Sapdanga, Vanlalhlana, C. Lalsawivunga, Lalthansanga, D r . V a u l a l t h l a u a , P.C.Vanlalruata, Lalrinpuii, F. Rodingliana, B. Lalchbanzova, Prof. Lalnilawma aser Lalngbinglova Hmar.

Hunter Biden anema ken o tanabuba benokogo



Washington, Luchii/ December 08 (Agencies): Hunter Biden anema federal prosecutor temi tax ken o ka benokogo, koba US tir indang jabaso asoshi ken o tanabuba alitsü.

Pai 2016-19 tsungta federal taxes sen million \$1.4 magütsüsü tasa yanglu ta ken o benokba nung shia lir.

Tim masüba mapa tamajung asem aser aibelen tila trok nungya tax magütsüba, tax return tiazü agütsüba aser tax asadangba nungi jenbutüsü merangba densema lir.

Delaware nung federal firearm ken o nung arishi küm 53 tain Biden anema September ita ken o ka benoka liasü.

Ken o tasenba ya yimtenren tsüsü tenük yoker benokba lir ta pa indang okatsür temi Brehostibar aonung ashi.

Iba ken o benokba nung Tir Joe Biden tenüng mali aser White House-ia tang tashi sangdong kecha agüja mali.

Taruba küm tir election nung tokteptsü lenmang bushia alisang Tir Biden anema ken o benoka jembishinüba nung congressional Republicans temi Hunter Biden indang shishilempaba inyakyim ya benoka lir.

Tax ken o nung aitsüra Hunter Biden ya küm 17 tashi tepuokdak ayutsü.

US Department of Justice Special Counsel David Weiss-i Yale nung azüngsang lawyer aser 2019 küm nungi temesepba mozü yutsür alisang Hunter Biden indang ken o bushisüngdang.

California nung kaket tapak 56 nung zülur ken o benokba nung prosecutor temi ashiba agi, pai pa indang sen ya temesepba mozü, escorts aser tetong tem, luxury hotels aser rental properties, jenjang tulu aliba gari, aben-süoshi aser danga nung indok, saka tax bo magütsü.

Tir jabaso-i 2016 aser 2020 tsungta sen million \$7 dak tema nguogo, saka 2016, 2017, 2018 aser 2019 indang tax tem asaa

peria aru ta ashir.

Pa sen aruba lenmang timba akumba ama dangar dak nungi alia libaliruba nunga sen tali indok ta ken o benokba nung shia lir.

2018 küm Hunter Biden-i sen million \$1.8 dak tema indok aser yangji dollar meyirijang aika cash agizükba, tetsürtem nem sen \$383,000 shi agütsüba aser aben-süoshi nung sen \$151,000 indokba dena lir.

Ajisüaka kasa küm pai pa kinuntsü tejenla dang sen peria maliba ajanga tena balaba mapang court ajanga la nem agütsüsü tuyuba sen magütsütetsü ta text yoka liasü.

Kasa mapang pa luxury hotel balala nung ali, sex club ka nung sen \$10,000 indoka züngsem ali, exotic dancer ka asoshi airline tickets sen \$1,248 agi alija liasü ta ashir.

Pa indang tax balala menoktsü sen peria liasü, saka pai memonok ta prosecutor temi ashir.

Taküm meyi mapang Internal Revenue Service (IRS) whistleblowers anati Congress nung kuli agütsüba mapang, Hunter Biden anema tax crimes tamajungba ken o benoktsüla liasü, saka pa tir jabaso asüyong temerenshi ajemtsü, ta ashi.

House of Representatives Oversight Committee ajanga Tir Biden anema ken o benoktsü meranger aser pai par jabaso den külemi pa jenjang amshia par ajanzüktsü mapa inyak ta aitsür.

memonok, ajisüaka item tax kar mesüra ajak menoktsüsa sen bo ngutet ta parnoki ashir.

Hunter Biden indang attorney Abbe Lowell-i iba ken o tasenba atema telanzüba agütsüdang, Hunter indang tenüng tatembangba ya Biden masü asübo Delaware nung ken o benoka aliba aser tang California nung aliba ken o ya mebenoki lila, ta ashi.

Hunter Biden-i pa indang personal attorney dang sen apuba teyari nung taxes aser senchi ajak 2020 nung menoka liasü.

2016-19 tsungta pai "adult entertainment" atema sen \$188,000 dak tema agütsü aser "payments - various women" atema sen \$683,000 dak tema agütsü ta tai tongloktür.

Hunter Biden-i 2018 nunga sen peria aazük aser talubosa indok, ta prosecutor temi tai tongloktür.

Chinese business conglomerate ka den külemi amenokba company ka, Ukrainian energy company Burisma aser tenüng agüja maliba Romanian businessperson amala nungi sen

MULUNGNEN O



ASO: 10-07-1967

ASÜ: 29-11-2023

Onoki teti dang meima aliba Obala/Kinungbo Late. **Rev. Tiayanger Longkumer**, Pastor Ao Baptist Arogo Pudumpukhuri shirangba mapang nungi tasüba anogo tashi kinunger, tembar, kiyonger, Arogo, Lokti balala aser kija Kibong shirnokisa ozü asüko mangyim mapang nung nübo, shisatsü, rongsen aser sarasadem ajanga yariogo nenok ajak dang tepela tulu lemsateper.

Tajung Tsüngrem-i nenok ajak maneni moajang ta ozü tamang sarasadem.

~Temeim Kinüngtsü, chirnurtem aser kinüngertem.

MULUNGNEN O



ASO: 28-02-1938

ASÜ: 02-12-2023

"Ni asoshi taküm alibaji Khrista, aser Tasütsü ji tajanzük lir"
Filipi 1:21

Onoki teti meima aliba tsürabur asür **Mr. A. Imli Nokdir (Molungyimsen)** Kibubai pa teti anisüngzük dangi anir ogo. Pa akümlidang aser tasünü tashi nung nenok shirnoksa rongsen, nübu aser sarasadem agi onok yariogo, nenok ajak dang kinungtsü, chirnur, semchir aser kinungertemi pelaba lemsateper.

Talisa:

1. Kohima Ao Baptist Arogo (KABA)
2. Kohima Molungyimsen Senso Telongjem
3. Lower Bayavu

Tsüngremi nenok mapa tajung asoshi moajangma.

Pai toktsür aoba Kinungtsü, Chirnur, Semchirtem aser Kinungertem.

UNSC senden amentsü lia US-i Israel tali aitsür

Washington, Luchii/ December 08 (Agencies): United Nations Security Council (UNSC) senden amentsü renemtepba mapang United States ketdangsür temi Israel-i Gaza nung raraba tali aitsür.

Ita ana raraba nung ceasefire akhangtsü asoshi pangzüng ka yanglutsü atema UNSC senden ya Hokulbarnü ayongteptsü imlar. Washington-i Israel dang tekumdangtsü shiaka US-i pangzüngbo magizüktsü amai angateter.

"Israel-i civilian tem kumzüka ayutsü kanga tongtipang lir," ta US Secretary of State Antony Blinken-i Brehostibarnü osangbener senden ka nung Israel-i Gaza tesashiba amakba athishia ashi. Gaza nung Hamas den raradang nisung 17,000 dak tema tepsetogo aser Palestine nunger million 1.8 dak tema pei ki yutsür tesem balala nung jenoka lir.

"Civilian tem kumzüka ayutsü tebilemba aser raradak asangsang atalokba tsungta tawa lir," ta Blinken-i ashi. Phone ajanga Israel Ato

Kilonser Benjamin Netanyahu aser Jordan chuba Abdullah den jembidang US Tir Joe Biden-ia civilian tem kumzüka ayutsü aser Hamas nungi civilian tem balaka bendangtsü nüngdaker ta ashi.

Ajisüaka Israel defence minister Yoav Gallant den Hokulbarnü jembidang US Defense Secretary Lloyd Austin-i maneni kiralongraba nungi kumzüka alitsü Israel temeden bhukumer, ta shia liasü.

Israel-i akok tashi civilian tem meyirutsüsü mesüra metepsettsü meranger aser Hamas dak dang tenük yoker amaker ta ashir.

Ajisüaka UN ketdangsür aser rights group temi Gaza nung nüburttem anisüngzuka alitsü tesem mali ta ashir.

Tekeraba nung humanitarian ceasefire khang pangzüng ka yanglutsü atema UNSC ya Hokulbarnep New York nung adenshitsü imlar. Iba document ya United Arab Emirates-i yanglua lir, koba linük 15 agi akumba council nung khen atema züngsem lir. UNSC ya UN nung telemtetba agiba tematiba council ka lir.

SITUATION VACANT

JUBILEE MEMORIAL SCHOOL (Affiliated to CISCE, New Delhi)
Salangtem Ward, Mokokchung, Nagaland

- | | | |
|----------------------|---|----------|
| 1. PGT (ENGLISH) | - | 1 Post. |
| 2. PGT (MATHEMATICS) | - | 1 Post. |
| 3. TGT (PHYSICS) | - | 2 Posts. |
| 4. TGT (CHEMISTRY) | - | 2 Posts. |
| 5. TGT (BIOLOGY) | - | 1 Post. |

Sl.No	Minimum Qualification	Salary (Starting)
1.	M.A. (Linguistics/English) with B.Ed. from recognized universities/institutes.	Basic Pay ₹ 25,300/- + HRA and MA. NPS and Gratuity after regularization
2	M.Sc. (Mathematics) with B.Ed. from recognized universities/institutes.	
3-5	Bachelor Degree with Honours in the relevant subject with B.Ed. from recognized universities/institutes.	Basic Pay ₹ 23,800/- +HRA and MA. NPS and Gratuity after regularization

DATE OF INTERVIEW: 14 December 2023, 8:00 A.M. at Jubilee Memorial School Complex. Interested candidates may apply with complete bio-data by 13th of December 2023. Please note that NO CALLING LETTERS WILL BE ISSUED separately. Candidates can send their Bio-data (Personal information) through e-mail: jmschoolna001@gmail.com
Contact: 0369-2226319

Sd/-	Sd/-
Principal	Chairman, BOG
Jubilee Memorial School	Jubilee Memorial School
Mokokchung, Nagaland	Mokokchung, Nagaland

GOVERNMENT OF NAGALAND

STATE COUNCIL OF EDUCATIONAL RESEARCH AND TRAINING, NAGALAND, KOHIMA.

NO.SCERT/TET/GC-2/2022/

Dated Kohima, the 6th Dec. 2023.

NOTIFICATION

This is to inform all the concerned candidates who have appeared for Nagaland-Teacher Eligibility Test - 2023 (N-TET), that the result of the examination is uploaded in the SCERT website - scert.nagaland.gov.in

Pass certificates will be issued from the Office of the SCERT from 11-12-2023 to 15-12-2023 in the office hours. The passed candidates are required to bring their respective N-TET 2023 Admit card to collect the N-TET certificate.

KEVIRALE-Ü KERHUO
Director
SCERT, Nagaland, Kohima

Kohima nung NABA tentetba sentong aser Aainball training ali



Kohima, Luchii/December 08 (TYO): Nagaland Aainball Association (NABA) tenzükba sentong aser Aainball Sport training tenzükba sentong ka Hokulbarnü Indira Gandhi Stadium Kohima nung agia liasü.

Iba sentong nung jembidang Aainball Federation of India indang founder president Pratap Singh-i ashiba agi, iba asaya tasenba ya alima ajunga nung kanga sapua kumdar aser asaya tenzükba kum ter dang süaka linük 40 jungnüa nung asayar.

Iba ya sentsü aser skill balala nung amendaka lir aser saksalem aser temang shidak alitsü nungdaker, ta pai ashi.

Iba asaya nung India junga

kumtar aser saisapong nung sempet aliba Naga nung aser Northeast nung alirtema national team nung asayatetsü sempet lir, ta pai ashi.

Naga nungeri national aser international medals bener arutsü asoshi Aainball ya maongka ka lir, ta pai ashi.

Taruba kum Hornbill Festival nung AFI aser NABA lungjemer iba asaya ya shilem ka kumdaktsütsü, ta pai metetdaksü.

Singh-isa NABA ketdangsür shimba shiti amokja liasü. NABA tir tasenba MLA aser Leader of NPF Legislature Party, Kuzholuzo Nienu-i state nung iba asaya tematiba jenjangi ajungkettsü asoshi AFI leniba kübok

meranga inyaktsü ta ashi.

Aainball ta 2020 kum alimai meteta akum aser tangbo official team amenokogo, ta pai ashi.

Iba sentong nung NABA general secretary Avizo Nienu menden liasü aser Soul Harvest Church of the Living God, Kohima indang pastor Kezevituo Pucho-i sarasadema sentong tenzük.

NABA vice president & DCP Dimapur Vesupra Kezo-i tarur pela agizükba o jembi, NABA coach Aron Kiba ajanga melepzung o jembi aser Pastor, Flames of Fire Baptist Church Kohima Ruokuolhoulie Solo-i sentong tembanga sarasadem. Iba sentong nung Avibou Belho-i temeja ken ka tena liasü.

Paris 2024 Olympics nung Russian aser Belarusian athletes tem neutrals ama tokteptsü

Luchii/December 08, 2023 (Agencies): Paris 2024 Olympics atema qualify sür aliba Russian aser Belarusian athletes tem neutrals ama shilem agitsü melatsü, ta International Olympic Committee ajanga metetdaksüogo.

Parnok ya par linük indang nisan, emblems mesüra anthems medeni shilem agidaktsütsü.

February 2022 nungi tenzükba Russia-i Ukraine amakba sülen linük ana nungi athletes tem nokdanga liasü.

Kija nem shilem agidaktsüba ya meimchir temeden akumtsüboba indang lir, ta IOC ajanga ashi.

Tenokdangba ya shidak meinyakra Games nung shilem magitsü ta Ukraine-i amokmerena liasü, saka taküm kum tiyonglen par tamendakba tera melenshia liasü.

Olympics sports federations ajanga IOC dang Russian aser Belarusian athletes tem Paris nung neutrals ama toktepdakjang ta hopta tetenzüklen asüngdangba sülen iba telemtetba ya agi.

"IOC indang executive board ajanga International Federations indang tang aliba qualification system ajanga qualify sür aliba individual neutral athletes (AINs) tem Olympic Games Paris 2024 nung shilem agidaktsütsü

lemtetogo," ta Olympic body ajanga Hokulbarnü ashi.

"AINs ya Russian mesüra Belarusian passport aliba athletes tem alitsü. International federations aser international sports event organizer atema March 28, 2023 nü IOC executive board ajanga recommendations agütsüba nung ajemdaker asayatsü."

Russia aser Belarus nungi kija athletes tem pei linük indang team ka amasu saka kija ama shilem agidaktsütsü IOC ajanga sports federations dang March ita shia liasü.

Ukraine nung raraba bhukumer athletes aser support personnel tem madentsü, ta ashi.



London kübok Tottenham Hotspur Stadium nung West Ham aser Tottenham Hotspur tsüngta English Premier League 2023-24 asayaba nung West Ham-i 2-1 agi takok ngur fans tem den pelatepba noksa nung angur.

Guwahati Masters: Malvika Bansod, Ashwini Ponnappa-Tanisha Crasto nungertem semi tongogo

Guwahati, Luchii/December 08 (Agencies): Kija asayar Malvika Bansod aser Ashwini Ponnappa aser Tanisha Crasto nungeri takok ngua Hokulbarnü Guwahati Masters Super 100 badminton tournament semi-final tongogo.

Arishi kum 22 tain Malvika ya singles draw nung India tsür la kisung lir, aser lai Malaysia tsür Karupathevan Letshanaa madak 21-12, 21-16 agi akok aser Ashwini aser Tanisha nati Indonesia tsür Jesita Putri Miantoro aser Febi Setianingrum na madak 22-20, 21-16 agi takok ngua last four stage tongogo.

Malvika ya semi-final nung

Thailand tsür Lalinrat Chaiwan den asayatsü, shibai seed asemubaba nung alila Sung Shuo Yun madak 21-10, 16-21, 21-16 agi takok ngua liasü.

Tetsür tarep asaya quarterfinals nung Tanisha aser Dhruv Kapila nati Indonesia tsür Amri Syahnawi aser Winny Kandow na 21-16, 21-17 agi tsükdaktsü.

Tebur tarep quarterfinal nung India nung Hariharan Amsakarunan aser R Ruban Kumar nati külem lisopur Kapila aser Vishnuvardhan Goud na 21-18, 9-21, 21-18 agi tsükdaktsü.

Tena ya semi-final nung Chinese Taipei nungi Lin Bing-Wei aser Su Ching Heng den asayatsü.

NDPP 29 Jangpetkong... (Tapak 2 nungi...)

Chief Minister Neiphu Rio-i tenzükba CMHIS ya NDPP indang flagship programme ka lir, aser iba yagi state nung aliba nüburtem nem health insurance agütsütsü ta pai ashi.

Iba dak sendakba nung Aodangnok-i Advisor Temjenmenba dang pelaba lemsatep, shibai nüburtem terenlok aser ajungtsü asoshi mezüing inyaker aser iba special drive sponsor asü.

Department of Health & Family Welfare ajanga NDPP den lungjemer iba scheme nung tenüing mezüluoktetali aliba yimdaklir yaritsü asoshi yimtsüing tonga aruba atema pelaba lemsatepa liasü.

Nisung ka temang anema alitsü ya takzüksü makok, anungji beneficiary ka ama tenüing züluokba sülen mozüki nung temang anepalua amungba mapang iba scheme yagi teyari tulu agütsütsü, ta Aodangnok-i ashi.

Anungji pai constituency nung aliba nübur ajunga dang iba maongka agia pei tenüing züluoker health insurance teyari agitsü ayongzükba liasü.

NDPP nungi telok ka aser CMO Office, Mokokchung nungi medical department personnel tem hopta tepiyong iba constituency nung amungtsü aser temsüa alir ajak iba CMHIS nung tenüing züluoktsü.

Ninang metsür nem scientific... (Tapak 2 nungi...)

Ajak ajungtsü asoshi pai ninang tabu ajak wazüka ayutsü ayongzük aser aluyumertem dang training nung shisatsü tali angazüksü ajungshia liasü.

Session tanabuba nung Lily Tep, Apitherapist, Terogvunyu ajanga aluyimer dang ninang metsüba nung modern technology balala amshitsü asoshi maongka agitsü ajungshia liasü.

Lai ninang ajanga tashidak balala nungi taneptsü anguba indang rateta ashi.

Ngukho, Bee Professional, AICRP (HB&P) ajanga session tasembuba nung 'pollination' nung ninang ajanga tongtipang shilem agiba indang rateta ashi aser scientific yimya nung ninang metsüba tajangzük indanga jembia liasü.

Technical session pezübuba nung melepzung o jembir Dr.

Avinash Chauhan, PI, AICRP (HB&P) ajanga Meliponiculture & Apiculture nung development biology, social organization aser quality management indang jembia liasü.

Training agirtem tenüing nung Hanchulo Jemu-i iba sentong ayongzükba asoshi AICRP(HB&P) ICAR, SAS, NU, Medziphema dang pelaba lemsatepa liasü.

Iba training tembangba sülen ninang metsüdang amshiba hadir aser kulizüing kaket lema agüja liasü aser practical session tem Lily Tep, Apitherapist ajanga agi aser Dr. Avinash Chauhan, PI, aser Ngukho, Bee Professional ajanga ninangsep timba kumdaktsüba, ninang mojitzü agizükba aser longlang asoshi scientific bee boxes amshiyim sayua liasü.

BILEMDANGANG
"Tanü mapa nung nai amdakra asüing nai nüdak temolung alemtsü."